

浙江文叢

桑調元集

〔第三冊〕

浙江出版聯合集團
浙江古籍出版社

浙江文叢

桑調元集

〔第三冊〕

〔清〕桑調元 著 林旭文 點校

浙江出版聯合集團
浙江古籍出版社

弢甫五嶽集

總序

遊嶽必五者備而後可暢雅懷，非徒婚嫁須畢也。夫畢婚嫁，則家累不攪心，斯可以發遊興；巉岳洞窟，興騎所不能到，是必得濟勝之具；舟車遼闊，行李往來，遊貲宜裕；幼弱不知遊，壯盛有所營，龍鍾之老不任此，則必及遊之年；樵夫牧子，日夕攀登，卒無一字，必吟眺足發川巖幽異，乃爲不負山靈。

予家婚嫁極簡易，有生不省家事，於禮成日，惟飲酒。昔侵曉送女出閤，即往丁仙洞，有句云：『比較向平先一着，未須了局便看山。』山情故自勃勃，體素便登涉。盛年遊山，輒徒步往。故人葉惺齋相遇於雁蕩之馬鞍山，見予赤腳踏流泉徑去，詫爲奇事。筆耕所入，足辦行裝，鄙性不輕就親知一飯。自辛未發軔嵩山，時年五十七，中間一年不遊。華泰衡恒，凡六年而遍，於今六十有二矣。筋力雖衰，尚堪登躋嶽頂。性癖耽吟，登高懷古，胸中有如許物，必傾吐乃快。衡恒路益遠，興益豪，所作益多，初不計工拙。五嶽巔奧，俱遍灑墨跡。凡所涉歷，陰雨開霽，虎豹遁藏，邊塞苦寒，亦較常年暄煖，豈敢謂感通嶽靈，蓋一物荷皇天之慈而已。頃過日下，視女病，纏牽於懷。向平之累之不易遣乃爾，然不廢予遊。五嶽惟華山最奇險，過青柯坪，攀鐵索上，死生直在呼吸，然奇景步步，超越意表。嵩二室、泰兩觀，其幽勝在盧巖黃華洞。衡

山回雁雲麓，首尾迤八百里。恒山孤峰陡峭，統領萬山。昔人謂嵩山如眠，泰山如坐，華山如立。予益以二言：衡山如行，恒山如蹲。斯足盡其勝槩矣。

予意興在遊，亦因以求訪異人。華山蒼龍嶺上，李道士爲予言：南頭一處所，值雲氣開朗，人民廬舍阡陌，了了在目，狀類桃花源。予庶幾一見之，悵望彌日。衡山見一人，左股大於身，中心惻惻。而所謂異人者，竟不可得，豈魁傑深藏不可蹤跡耶？抑塵俗不堪密邇耶？豈心羸眼翳，交一臂失之耶？抑天地標奇於山水，氣力不能鍾毓耶？

《五嶽集》共得二十卷，遂僭號五嶽詩人，前之題名『獨往生』。惟恐遊之不及遍，今幸天遂予之初願。遊之佳處，予當境自得之。所存詩，真雪鴻之跡哉！

乾隆丙子十一月月幾望，五嶽詩人桑調元自序。

嵩山集序

予性好遊，有遍五嶽之志。歲戊辰來中州，嵩山雲嵐固應入吾屐底，顧忽忽蹉跎至今。山中友人貽予書曰：『名山如好友。子客中州而不嵩遊，是交一臂失之也。』予遂發憤，賃一柴車，無朋儕，無謙從，所至停軌於坡陀之足，獨策一藤，窮幽極峻。意有所得，則嘯呼作爲歌吟，淋漓題厓壁，不著名，祇署『獨往生』，自前遊天台、雁蕩、洞庭之勝已然。喜老而濟勝之具尚在，汲汲遍佳山水，足果汗漫遊之諾。道所經古跡清景，輒一詩與收拾。中有寄吁慨不能已者，物外人未得竟。無心肝，吟畢即置之，要不使胸中留滯。予早就恬寞，於世味久雪淡。間齒及衰遲，亦怵於沒世無稱之實，非畏景之晏也。詩不求工，聊記吾目前遊踪已矣。

乾隆辛未後重午日，桑調元自序。

嵩山集卷上

詩一 古今體詩九十四首

嵩遊口號

中州山水暢乘凌，手攬蒼厓萬歲藤。蓋卓一峰雲氣擁，灘高八節浪花騰。遊參禽向吾應得，飛逐猿猱老尚能。最惜春風餘幾日，回看苑樹綠層層。

登車

微雨浥輕塵，登車發興新。清遊始中嶽，好景屬閒人。地擅三川勝，天留幾日春。猶餘花柳色，紅翠眼邊勻。

出郭三首

出郭已清曠，林垌無市聲。村花疎掩冉，野麥細縱橫。溝溢前宵雨，雲催卓午晴。金明池

上柳，含翠送人行。

今歲春寒峭，郊原百物遲。桃花紅未雨，楊柳碧纔絲。騁望聊乘暇，耕耰恰及時。連晨和澤遍，天地本無私。

葱蒨當韶景，柴車迤邐行。春原千頃綠，黃犢一聲鳴。老洫農爲塹，新亭客記程。無心雙隻堠，道左自將迎。

雨憩韓莊

連村畦水渌，一雨湔客房。蔬枰色蔓蔓，屋山聲琅琅。紅英散風牖，翠縷搖煙莊。威紆暫輟輓，安隱聊傾觴。寧知野服濕，且對春物芳。空濛極郊甸，滿眼羅青蒼。

水月庵

萬象從教淨破除，也知水月是空虛。如何不用茶毘法，留取人間一土苴。寺有僧真身傳金，尚存。

雨中絳桃

緋桃開一簇，雨望轉嫣然。潑處火逾熾，濯來錦倍鮮。行迷武陵水，夢斷瓊臺煙。翻喜春

光晚，能令騷客憐。

雨行中牟道中

元雲羃天末，澍雨飛隴頭。芳田野雉雊，春聲最和柔。花下艤漁艇，水中行客輶。邇迤坦橋度，滸汨方塘流。我馬嘶煙樹，我僕睇譙樓。逆旅却如歸，涼景還如秋。

見漁舟作

一水潨洄好，經過略約平。漁郎何處去，煙艇此中橫。故國心潛觸，塵途眼乍明。西谿久拋却，夢斷棹歌聲。

訪官渡

官渡知何處，蒼茫想舊城。曹袁遺壘失，煙雨綠蕪平。大地幾龍戰，空天一鶴迎。無窮家國事，物外詎關情？

中牟曉發

宿雨已盡收，曙光猶半黯。輾轉客車馳，寂寥村戶掩。縈青柳千條，飛白鷗一點。桑柘早

日寒，郊垌遠煙淡。春水漾汀沙，微風響葭菼。行子愁朝飢，出鑪餅可啖。

白沙鎮

驅車白沙鎮，夾廕綠楊堤。急送春風盡，都緣萬縷齊。天晴鴉噪喜，塗亂馬行迷。野菜花如繡，東園想故蹊。

列子祠

我生亦好遊，獨往意汗漫。先生繕性熟，脫棄塵跡踐。官粟不妻子，野屨只里閭。言類接輿狂，形異琴張慢。窮老隱深霧，元豹無人見。圃外度靈風，拂水泠然善。

鄭州

輪蹄來往各爭程，賸客閒心獨寡營。春水新波流汗漫，原田陳跡莽縱橫。際天粦麥無窮綠，過雨塵沙分外清。此日遊踪師列子，泠然也自御風行。

逍遙公故里

宦遊淹塵跡，誰復還林屋？歎息逍遙公，別占幽棲谷。星罕飛山莊，煙樓跨澗隩。恩遇

逐雲龍，榮華一蕉鹿。雨泫東巖花，風嘯北溪竹。故里夕陽寒，波光動群木。

庚午渠

僕射陂前水，瀾漫四散流。只今千派漲，却有午渠收。麥浪青浮野，楊絲翠映溝。迴波春浩蕩，飛去一沙鷗。

謁子產祠

兵爭王澤竭，波蕩民風頽。慨想能爲國，閔濟非公誰？荒闡祠宇在，下馬拜階墀。白日隱高樹，春風吹網絲。何人嗣芳躅，令我紛涕洟。翩翩吳季子，投分固其宜。

燭之武退秦師處

吾惜燭之武，縋城能退秦。才奇空已老，事急有斯人。遺堡風梳柳，殘碑雨洗塵。番番懷蹇叔，千載共沾巾。

須水鎮

須水晚煙翳，極目寒蒼蒼。遠樹澹春色，空波明夕陽。分林下鳥雀，識戶歸牛羊。林墟看

漸暝，野逕覺猶長。柴車帶星影，茅舍延燈光。戶小不勝飲，新泉浮一觴。

曉發滎陽

侵曉纖驪駕僕夫，道傍煙柳影模糊。明星煜煜光於月，清露濃濃墜似珠。午夜捫心完素志，十年回首愧塵途。棟花風入陶嘉候，春色堂堂惜暗徂。

漢祖繫馬槐

歷亂鴉飛曉樹林，蒼涼無復古槐陰。時平久失成臯險，氣盛猶爲廣武吟。繫馬終然成帝業，斬蛇早已定天心。憤王誤割鴻溝界，不逝烏騅淚滿襟。

京叔段

叔段懷中物，如何敵寤生？慙惟啣鄭志，侈自壞京城。白日黃泉下，荒墟蔓艸平。同根還可念，嘆息豆萁情。

弔石季倫二首

自古金爲崇，誰教穴季倫？讒應恨孫秀，讖自痛安仁。荒艸纏幽磴，殘花綴古春。繁華

消歇盡，嗟爾墜樓人。

銑溪何足問，往事歎金塘。世亂幽囚數，財雄禍患重。翔風石崇婢，名拋艷態，步幃失遺蹤。洛下青山曉，微聞遠寺鐘。

滎陽道路多關峻，阜中隘僅容車長，或里許感賦成咏

客行滎陽道，土阜高插天。是中通一徑，雙轂不得旋。左右立峭壁，飛猱愁攀緣。顧瞻脩且狹，形勢車箱然。車箱苦難出，氣結何由宣？來者一以阻，倒行讓誰先？春雨零十日，泥濘倍屯遭。冥冥怪鳥叫，汨汨衝波漩。一夫或爲暴，要害搯吭咽。人迺驚幽谷，出迺超重關。如何開闢初，天成此險艱。智勇了無施，誰能鏟孱顏？塵途每多隘，惆悵爲此篇。

廣武吟

樹木何蓊蔚，岡阜何嶮岼。下臨不測谿，橫漲飛驚湍。地形信險隘，彫虎扼雄關。昔人圖霸王去聲，轉鬪京索間。隆準運方厄，戰敗成阜還。九天龍失躍，晉井潛泥蟠。鴻溝盟一渝，大號建瀛寰。成敗勢已定，乃嗤沐猴冠。汜陽即帝位，威加良已殫。狂言詆孺子，咄哉廣武歎。

汜水潘涵亭同登元武臺望釜山黃河太行虎牢伏蛟諸勝過竹院茗話

約詰朝遊竹川不果赴有作得八首

之子絕俗人，清心謝塵壒。把袂梯層空，目盡河嵩外。青螺秀雲坳，白鷺渺沙瀨。回颺激石樞，杉檜發仙籟。天際立松喬，瀏觀別有會。元武臺在城內。

蒼蒼萬雲巒，翠分嵩少支。釜山蒸暖靄，群峰鬱參差。落景霞嵐合，天縝紛葳蕤。春空裊青髻，一氣澹沲之。妙契清遊人，山心結在茲。釜山在正南。

大河自天來，并合群流渾。水氣黃日月，九折喧雷奔。登高望洪波，渺然一練痕。冥茫玉門渡，終古如帶存。逶迤汜水注，春靚橫厚坤。慨想古豪傑，駐立至煙昏。河在西北。

行山影落日，際天一髮青。修靄自橫亘，不辨峰巒形。山東二百州，亭毒包元精。河流界一綫，遠勢列幃屏。縣山抱玉玦，缺處軋霄崢。蒼然暮色至，乃與萬象冥。行山遠隔河外。

周王獵東都，實至古崑關。桓桓七萃士，搃虎拖爛斑。茲地信險要，壯勢凌孱顏。古來爭戰地，生草血色殷。承平踰百祀，吹角列成閒。春山淡夕照，半嶺樵歌還。虎牢在西。

亭亭伏蛟山，鋪翠不可斂。夕日明高青，春厓發群艷。松色一坪深，雲陰半坳澹。依微芳艸藁，下有仙人窆。伏蛟山在西。

青冥下危梯，一亭立坦迤。雨苔濃作花，春竹澹如水。空檻夕陽低，孤城暝煙起。羨我遂

初衣，微慨寓深旨。萬事浮雲然，柯茗有實理。竹院在元武臺後。

仙邑有靈區，一川映疎竹。曲池春不波，叢筠露如沐。題字上脩青，流觴下寒淥。遂約御風行，深遊躋白谷。嵩雲遙相招，幽韻謝憂玉。會當續清緣，裹糧來不速。

曉發汜水二首

汜水平不流，微瀾一何靚。凌晨暖輕煙，浮光自娟淨。沙禽獨足拳，凝靜侶禪定。罔罔東光生，遠波動清映。群山明髻螺，寫入白銅鏡。

曦輪出未高，山脚猶薄霧。濛濛侶白雲，瀾漫映芳樹。巖坳轉陽光，五色紛纂組。連山何崔嵬，千仞皆積土。點染施天工，本質添秀嫵。春山無定姿，暄妍半隱露。

陶穴

春巖碧叢叢，麥光翠欲溜。人家陶穴居，山腹成架構。屋下自晨炊，屋上自耕耨。衡從無町畦，雜蒔綠如繡。時邀風掩扉，夜絕星過雷。足知上皇民，淳樸多黃耆。

晚春感興

春深碧草縟，蝴蝶紛交飛。林日翳茅宇，水風涼袷衣。衰鬢幾絲短，芳郊群綠肥。花事垂

欲盡，愁絕春安歸。

洛水

浩淼臨洛水，春瀾清且長。霏微芳樹岸，沿緣泝流光。頻年局曲室，不見浮舟航。今晨面淥漪，篙竹森連檣。北客燈照蝎，得歸喜洋洋。官人愛新綬，遊子思故鄉。我客亦已久，對此轉茫茫。

杜工部故里

青山入鞏洛，秀色超塵寰。鍾英產詩老，悲歌成史編。契稷輒自許，高李空隨肩。東郊傷瘦馬，西川拜杜鵑。我行敬草樹，式此南瑤灣。嗚呼斯人逝，吟者無其賢。

三田故里

三田如荆樹，本自懽同株。如何中離異，頓使連枝枯。離者輒復合，枯者仍榮敷。遺風成雍睦，足爲鄉里模。曠林不相能，帝遣各一區。歷山憂未解，于田泣鳴鳴。周公與管蔡，零雨涕淚俱。可堪粟布謠，漢文心煩紆。有生遇乖違，飲痛無賢愚。李樹代桃僵，交讓同悲歔。相輝良不易，華萼愁蕭疎。精誠感草木，涕下沾衣襦。